

ULASAN BUKU

Mohd. Bakri Haji Ishak, 2015, *Undang-undang dan Pentadbiran Kerajaan Tempatan di Malaysia*, 187 hlm., 978-983-46-1397-6.

Pengulas: *Kamal Halili Hassan*
kamalhalili60@gmail.com

Fakulti Undang-undang,
Universiti Kebangsaan Malaysia.



Buku ini membincangkan undang-undang dan pentadbiran kerajaan tempatan di Malaysia dengan memilih Bandar Raya Ipoh dan Alor Setar sebagai contoh. Kerajaan tempatan telah diwujudkan sejak zaman penjajah lagi, dan selepas negara mencapai kemerdekaan, kerajaan tempatan terus memberikan khidmatnya kepada penduduk bandar dan bandar raya. Sesebuah bandar raya ialah ibu negeri bagi sesebuah negeri, dan semua sistem pemerintahan dan pentadbiran kerajaan negeri berpusat di bandar raya tersebut. Jumlah penduduk bandar raya mencatatkan jumlah tertinggi di sesebuah negeri. Pelbagai perkhidmatan disediakan termasuklah perancangan bangunan, jalan, taman, pelesenan, pengindahan bandar, pengutipan sampah dan pembaikan kampung baharu. Sesebuah bandar raya perlu diuruskan berdasarkan perundangan yang diluluskan oleh kerajaan.

Ipoh sebagai ibu negeri Perak merupakan sebuah kawasan atau lembah yang kaya pada suatu ketika dahulu. Ipoh yang berada di dalam Lembah Kinta turut merasai zaman kegemilangannya ketika lombong bijih timah beroperasi dengan pesatnya. Lombong bijih timah di kawasan sekitar Lembah Kinta juga turut menyumbang kepada pembangunan ekonomi dan fizikal bandar raya Ipoh. Malahan, bandar raya Ipoh pernah dinobatkan sebagai bandar terbersih di Malaysia. Sejarah awal penubuhan Majlis Bandaraya Ipoh dan penerajunya turut dipaparkan bermula dengan Lembaga Pembersihan Ipoh (1893-1897), Majlis Perbandaran Ipoh dan

Menglembu (1954-1956), Majlis Perbandaran Ipoh (1957-1962 dan 1960-an hingga 1987) dan Majlis Bandaraya Ipoh (1988 hingga kini). Bab ini akan lebih menarik jika sejarah bandar raya Ipoh, terutamanya tentang kemunculan kampung baharu di sekitar Ipoh dikupas secara lebih mendalam. Secara umumnya, struktur organisasi MBI terdiri daripada tujuh jabatan dengan beberapa bahagian dan unit. Setiap jabatan mempunyai objektif dan fungsi masing-masing yang selaras dengan fungsi MBI. Jabatan tersebut diketuai oleh seorang pegawai kanan MBI yang bertanggungjawab secara langsung kepada Setiausaha Bandaraya Ipoh dan Datuk Bandar Ipoh.

Proses dan prosedur meluluskan pelan bangunan dan pengeluaran sijil layak menduduki bangunan oleh MBI sebagai kajian kes merupakan perkara yang dikupas dalam bab dua buku ini. Fasa permohonan dan proses kelulusan bagi mendapatkan sijil tersebut amat penting untuk memastikan bangunan yang dibina selamat untuk didiami. Namun, masih terdapat ramai rakyat Malaysia yang membina bangunan, termasuk bangunan tambahan tanpa mendapat kelulusan daripada majlis kerajaan tempatan. Kerajaan perlu melakukan kajian bagi mengenal pasti punca pembinaan bangunan dan premis haram yang masih terus berlaku, terutama di kawasan bandar.

Bagi melihat sistem pengurusan sisa pepejal dan peraturan yang ditetapkan oleh pihak berkuasa tempatan, buku ini mengambil contoh kes yang berlaku di Majlis Bandaraya Alor Setar. Pengurusan sisa pepejal di Malaysia telah melangkah ke suatu tahap yang lebih baik berbanding dengan cara pengurusannya sebelum ini. Sistem tersebut telah diswastakan oleh pihak berkuasa tempatan (PBT) kepada agensi seperti Alam Flora Sdn. Bhd, Southern Waste Management and Environment Sdn. Bhd., dan Northern Waste Industries Sdn. Bhd. Meskipun demikian, kuasa utama yang mengawal dan mengurus pelupusan sisa pepejal masih terletak di bawah bidang kuasa PBT. Selain PBT, Jabatan Alam Sekitar juga turut berperanan penting membantu menguruskan pelupusan bahan buangan ini. Tiga jenis bahan buangan yang dominan ialah bahan buangan isi rumah, bahan buangan perdagangan atau komersial dan

bahan buangan perindustrian. Peranan Majlis Bandaraya Alor Setar dan setiap agensi swasta yang terlibat dalam aspek pelupusan sisa pepejal merupakan salah satu aspek menarik yang dikupas dalam bab tiga buku ini.

Penilaian harta tanah untuk tujuan cukai taksiran turut dibincangkan dengan menjadikan MBI sebagai kajian kes. Kutipan cukai penting dilaksanakan bagi menampung dana perbelanjaan sesebuah kerajaan tempatan. Jumlah cukai bangunan atau premis yang dikutip adalah berdasarkan penilaian yang dibuat terhadap bangunan tersebut. Dalam hal ini, pemilik harta tersebut diberikan hak untuk membuat bantahan terhadap cadangan penilaian sesebuah harta. Kaedah perbandingan lokaliti digunakan bagi menetapkan jumlah cukai seperti lokasi, kebolehbandingan hartanah dan keadaan pasaran semasa. Penilaian hartanah yang dilakukan oleh Dewan Bandaraya Kuala Lumpur dijadikan sebagai asas perbandingan.

Bagi melaksanakan penilaian untuk tujuan mendapatkan kadar dan menyediakan senarai nilai oleh pihak berkuasa tempatan, Akta Kerajaan Tempatan 1976 (Akta 171) (AKT76) diaplikasikan dengan menghuraikan kuasa tersebut berdasarkan seksyen 137. Antara kuasa yang terlibat meliputi peruntukan tertentu dalam Bahagian XV ialah kadar dan nilai Akta 171, termasuklah kuasa untuk mengenakan kadar, kuasa memberikan maklumat atau penyata yang dikehendaki oleh PBT, kuasa penilaian, kuasa penilaian bersama atau secara berasingan, kuasa pengecualian, kuasa menetapkan kadar bagi bangunan yang terletak di atas tanah kerajaan negeri atau tanah yang dirizabkan, penyediaan senarai nilai, penyediaan notis tentang senarai nilai baharu yang perlu disiarkan, alasan bantahan dan rayuan yang boleh dikemukakan oleh pembayar cukai taksiran, pengesahan senarai nilai baharu, pindaan senarai nilai dan rayuan, membuat rayuan, serta memohon pulangan balik bagi bangunan yang tidak diduduki.

Selain itu, Kementerian Perumahan dan Kerajaan Tempatan (KPKT) dan Bahagian Kerajaan Tempatan Pejabat Setiausaha Kerajaan Negeri Perak (SUKPK) mempunyai autoriti terhadap pihak berkuasa tempatan di Perak. Pihak berkuasa tempatan (PBT) pula tertakluk pada polisi tertentu yang disediakan dari

semasa ke semasa oleh KPKT pada peringkat persekutuan, manakala pihak berkuasa negeri pada peringkat negeri. KPKT pula bertanggungjawab terhadap sekurang-kurangnya empat jabatan, iaitu jabatan kerajaan tempatan (JKT), jabatan perumahan negara (JPN), jabatan perkhidmatan bomba (JPB) serta jabatan perancangan bandar dan desa (JPBD). Walau bagaimanapun, bab enam dalam buku ini hanya memberikan tumpuan pada peranan JKT yang bertujuan menggalakkan, memajukan dan membantu PBT menyediakan perkhidmatan perbandaran yang bermutu tinggi, termasuklah menyediakan kemudahan sosial, rekreasi dan peluang ekonomi yang seimbang. Selain itu, peranan Bahagian Kerajaan Tempatan (BKT) dan Unit Penilaian, SUKPK turut dibincangkan.

Di samping itu, buku ini turut mendedahkan amalan institusi yang berkaitan dengan pengurusan alam sekitar di Malaysia dengan merujuk peranan JKT dan Jabatan Alam Sekitar. Antara institusi lain yang terlibat termasuklah PBT dan badan swasta seperti Kualiti Alam Sdn. Bhd., dan Alam Sekitar Malaysia Sdn. Bhd. Wakil KPKT perlu dilantik, terutamanya daripada JKT bagi memperbaiki kualiti perkhidmatan yang diharapkan daripada Majlis Kualiti Alam Sekeliling (MKAS) kerana MKAS bertanggungjawab menasihati menteri dan Ketua Pengarah Alam Sekitar Negara. Struktur sesetengah agensi atau institusi berkaitan dengan alam sekitar perlu dibaiki dan dimantapkan atau dirombak semula bagi mengatasi masalah pertindanan fungsi dan tanggungjawab.

Pelbagai undang-undang kecil yang diguna pakai oleh PBT di Malaysia penting untuk diketahui kerana undang-undang tersebut banyak mengawal perlakuan pihak yang bertanggungjawab dan orang ramai dalam sesebuah PBT agar bandar atau bandar raya berada dalam keadaan yang selesa untuk didiami. Undang-undang kecil yang dirujuk termasuklah (i) Undang-undang Kecil Taman (Majlis Perbandaran Subang Jaya) 2005, (ii) Undang-undang Kecil Vandalisme (Majlis Perbandaran Subang Jaya) 2005, (iii) Undang-undang Kecil Tanah Perkuburan Islam (Majlis Perbandaran Subang Jaya) 2005, (iv) Undang-undang Kecil Pasar (Majlis Perbandaran Subang Jaya) 2005, (iv) Undang-undang Kecil Hotel (Majlis Perbandaran Subang Jaya) 2005, (v) Undang-undang Kecil Pusat

Siber dan Kafe Siber (Majlis Perbandaran Subang Jaya) 2007 dan (vi) Undang-undang Kecil Kebersihan Awam (Majlis Perbandaran Melaka Tengah) 1983. Seksyen penting dalam undang-undang kecil tersebut diketengahkan bagi menunjukkan kuasa dan peranan pihak berkuasa, serta tanggungjawab, larangan dan hukuman terhadap orang ramai yang melanggar peruntukan dalam undang-undang kecil berkaitan. Sungguhpun kebanyakan undang-undang kecil yang dirujuk berkaitan dengan Majlis Perbandaran Subang Jaya, namun peruntukan undang-undangnya hampir sama dengan undang-undang kecil di majlis perbandaran lain. Perbincangan kes mahkamah berkaitan dengan aktiviti PBT, iaitu kes *Majlis Perbandaran Seberang Perai lwn Tropiland Sdn. Bhd.* [1996] 3 *MLJ* 94 dan kes *Dewan Bandaraya Kuala Lumpur lwn Suppiah* [1991] 1 *MLJ* 149 diketengahkan sebagai kajian kes.

Pengurusan sisa pepejal oleh pihak berkuasa tempatan di Eropah, khususnya PBT di Sepanyol yang dikenali sebagai Ayuntamiento de Cadiz merupakan suatu perbandingan yang menarik jika dibandingkan dengan Malaysia. Antara perbezaan yang dapat dikesan dalam pengurusan sisa pepejal antara Malaysia dengan Sepanyol termasuklah aspek lokasi, bilangan tong sampah, program kitar semula, keseriusan PBT, sikap komuniti, penggunaan teknologi, pendekatan pentadbiran, undang-undang dan peraturan serta polisi kerajaan. Dipaparkan juga foto bangunan dan sistem PBT di Sepanyol sebagai rujukan dan perbandingan.

Jelasnya, buku ini berjaya mengisi kelompangan bahan penerbitan yang berkaitan dengan PBT di Malaysia. Maklumat yang terkandung dalam buku ini berguna kepada pegawai pelaksana dan orang ramai. Buku ini akan menjadi lebih menarik jika dimulakan dengan perbincangan sistem kerajaan tempatan secara umum dan undang-undang berkaitan dengan merujuk majlis atau dewan bandar raya tertentu, serta disusuli dengan lebih banyak kes mahkamah yang berkaitan dengan aktiviti kerajaan tempatan di Malaysia.